



Programa  
di Partido

**M21**

*E Diferensia*



## Prólogo

**D**espues di sondia i analisá opshonnan mi ta yega na e konklushon ku mester por otro; si sigui hasi e mesun kosnan den polítika na e mes manera, lo sigui haña e mesun resultadonan.

Ta opvio ku resultadonan den e struktura aktual te ku awor no a duna e mayoria di pueblo satisfakshon, tampoko ta kumpli ku e neseditatnan ku ta biba den pueblo.

Tin un neseditat grandi pa inovashon: inovashon den polítika, den e forma di hasi polítika, tambe den e persepshon i interpretashon di nos komunitat relashoná ku polítika.

Nos ta den e posishon úniko pa huntu nos konstruí un mihó Boneiru: un Boneiru ku bienestar i prosperidat pa kada siudadano. Un Boneiru ku no solamente mester ta bon pa nos, pero mester ta bon tambe pa atraé turista i invershonista djafó.

Polítika ta e vehíkulo ku ta usa pa sirbi interes di pueblo. Nos a yega na e movimentu ku mester trese inovashon den e polítika aki. M21 kièr traha huntu ku e pueblo i pa e pueblo.

### *Kiko ta distinguí M21 for di e otro partidonan lokal?*

- *Disponibilidat pa tuma akshon*
- *Dirigí riba futuro*
- *Posishon di prinsipio banda di maneho stratégiko*
- *Inovashon*
- *Integridat*
- *Solidaridat*
- *Honestidat*
- *Liderazgo firme*
- *Vishon kla pa logra desaroyo integral*

E programa aki ta definí idea- i ambishonnan di nos movimentu.

E programa aki ta pa tur hende sa kiko e movimentu aki ta para p'e.

***E Diferensia***

*Desirée Coffie*

*Kralendijk, 1 di yanüari 2023*



# Kontenido

Prologo	2	<b>4. M21 formashon i enseñansa, deporte i kultura</b>	<b>22</b>
<b>1. Introdukshon</b>	<b>8</b>	Reevaluá nos sistema di enseñansa	22
NOS MOTIVASHON	8	Rekonosé ku nos enseñansa mester ta multilingual.	22
NOS IDEOLOGIA	9	Ahustá enseñansa pa profeshon na merkado laboral lokal	22
NOS VISHON	9	Introdusí skol di fishi	23
NOS NORMA-, BALOR- I KONSEPTONAN	9	Skol di turismo	23
Igualdat	9	Stimulá studia den region	23
Solidaridat	10	Duna mas atenshon na Boneiru den kuríkulo	23
Fraternidat	10	Limitá “brain drain” boneriano	24
Supsiaridat	10	Krea fasilidatnan pa deporte.	24
Libertat	10	Arte i kultura komo fundeshi di nos sivilisashon	25
Hustisia Sosial	10		
Demokrasia	10	<b>5. M21 i salubridat</b>	<b>26</b>
Pluralismo	10	Prevenshon i mas prevenshon	26
Sosiedat Partisipativo	11	Drecha maneho di kuido di EPB	26
Derechinan Humano	11	Akohida pa pashènt ku mester rehabilitá	26
Interes General	11	Akohida pa kuido spesial mental permanente.	26
NOS MANERA DI HIBA KAMPAÑA	11	Integrá kuido básiko	27
		Hasi uso di traduktornan huramentá pa sostené pashentnan ku ta papia papiamentu i spañó.	27
<b>2. Nos kompromiso</b>	<b>12</b>	Mas i mihó koperashon den Reino	28
		Reorganisá e makutu básiko salú pa Boneiru	28
<b>3. M21 i desaroyo sosial</b>	<b>18</b>	Un solushon duradero pa atendé ku sushi na Boneiru	28
Introdusí mínimo sosial	19		
Kombatí pobresa	19	<b>6. M21 i desaroyo integral di nos barío- i bisindarionan</b>	<b>30</b>
Saneamentu di debe	19	Mehorá e infrastruktura aktual i hasié mas bèrdè i mas aksesibel	30
Introdukshon di un lei di fasilidat na momentu di desempleo	19	Mehorá merkado di bibienda na un manera sostenibel	31
Formashon kòrtiku ku garantia di trabou i guia na pia di trabou	20	Plan nashonal di barío	31
Promové integrashon sosial	20	Introdusí Konseho di barío.	31
Sistema di penshun	20	Baha preis di ticket di aviashon	32
Atenshon pa penshonadonan	20	Reorganisá transporte públiko i introdusí di transporte públiko general	33
Atenshon pa hendenan ku desabilidat	20	Transporte entre islanan ABC	33
Komishon di Rekonsiliashon	21		
Atenshon pa bienestar di animal.	21		

# Kontenido

<b>7. M21 i gobernashon</b>	<b>34</b>	<b>10. M21 i ekonomia</b>	<b>46</b>
Tur siudadano ta konta	34	Direktorado di Desaroyo i Ekonomia	46
Evaluá nos sistema polítiko	34	Fortalesé i krea sektornan ku ta generá divisa: turismo, zona franko, sektor finansiero internashonal	47
Evalua nos Konseho Insular	34	Un vishon pa Turismo	47
Mas partisipashon di gobièrnu di OLB den gobièrnu di RCN	34	Turismo Krusero	47
Mas partisipashon di nos hóbenan	35	Soña mas i tribi mas: ekonomia nobo	48
Mas transparensia den desishonnan ku Gobièrnu tuma	35	Studia posibilidatnan pa BOPEC	48
Fortifiká nos institutonan estatal	35	Sera dil nobo ku Cargill	48
Invertí den i fortifiká nos kuerpo di ámtenar	35	Mas espasio pa empresario chikí: ekonomia di barío	48
Instituí Konseho di Barío	35	Hasi forsa laboral mas kompetitivo	48
Profundisá konosementu polítiko di miembronan di Konseho Insular i Kolegio Ehekutivo	37	Invertí den infrastrukutura	48
Relashon di koperashon mas estrecho ku “VNG”	37	Desaroyá aeropuerto i nos hafnan komo pilánan ekonómiko	49
Registrá i manehá propiedatnan di Gobièrnu	37	Krusa frontera: ekonomia internashonal	49
<b>8. M21 i desaroyo sostenibel ku atenshon èkstra pa medioambiente, naturalesa i bienestar di animal.</b>	<b>38</b>	Promoshon di un kresementu ekonómiko sostenibel	49
Krea kondishon pa promové bienestar di animal	38	Krea kupo di trabou pa poblashon lokal	51
Desaroyo di un plan di maneho pa medioambiente Hulanda Karibense	39	Stimulá empresa mediano i chikitu (MKB) sostenibel	51
Invertí mas den naturalesa i medioambiente	39	<b>11. M21 i un Bonaire seif</b>	<b>52</b>
Mehorashon di kalidat di awa di suela	40	Garantisá siguridat na pia di trabou	52
Stipulá akuerdo di klima ku den Haag	40	Mester ta mihó prepará pa kalamidat	52
Energia duradero i pagabel	41	Traha riba prevenshon di kriminalidat den nos barionan	52
Buska konekshon ku ret internashonal di gas	41	Mas mantenshon di nos lei- i reglanan	53
<b>9. M21 i agrikultura, peska i krio di bestia</b>	<b>42</b>	<b>12. M21 i eksterior</b>	<b>54</b>
Siguridat di alimentashon: agrikultura, krio i peska	43	Relashon ku Hulanda i Den reino	54
Sòru pa awa pagabel	43	Relashon ku Karibe	54
Desaroyá un sentro di konosementu	43	Relashon ku Union Oropeo	54
Alsa nivel di krio di karné i kabritu	44	Representashon diplomátiko	54
Ofresé enseñansa riba tereno di agrikultura, peska i krio di bestia	45	Diáspora Boneriano	55
Desaroyá áreanan di agrikultura	45	<b>13. M21 i eksterior</b>	<b>56</b>
Promoshon di akuakultura Boneriano	45	<b>M21 Lista di kandidato</b>	<b>58</b>

# 1. Introdukshon

Bo dilanti bo tin e programa di Movementu21 (M21). Den e dokumento aki M21 ta kompartí ku bo nos ideanan. Banda di informá bo di kiko ta nos ambishonnan, e programa aki lo fungi komo punto di salida di M21 den gobernashon.

Apesar ku durante e kampaña polítiko aki lo tin amplio oportunitat pa nos kandidatonan duna splikashon riba nos puntonan di kampaña, sinti bo liber pa tuma kontakto ku M21 si bo ta deseá pa sea duna bo komentario òf hasi kualke pregunta riba nos puntonan. Nos ke tende di bo tambe. Por tuma kontakto ku nos na: [info@movementu21.com](mailto:info@movementu21.com).

## NOS MOTIVASHON

Movementu21 ta partisipá den elekshon binidero pasobra nos ta bai trese e diferencia: idea inovativo i hende nobo pa bòlto e rumbo ku nos ta den. Nos ta preokupá ku ekonomia no ta kana na bienestar di nos pueblo, ku no tin sèn, i e falta di desensia i honestidat den gobernashon. Movementu21 ta partisipá na elekshon pasobra Boneiru no por soportá 4 aña mas di gritamentu di Si kontra Nò i vise vèrsa. M21 ke saka nos for di pobresa, pone ekonomia kana na bienestar di nos pueblo atrobe i krea espasio pa invertí den konstrukshon di un Boneiru próspero pa tur su habitantenan. Mas ku tur kos, M21 ke forma un gobièrnu pa tur pero tur siudadano sin laga ningun hende atras.



## NOS IDEOLOGIA

Movementu21 ta un movementu di ideologia sosial liberal. Sentral den e pensamentu sosial liberal ta e libertat di pensa i aktua di e individuo pa determiná su desaroyo i felisidat, den mesun rosea e sentido sosial mester sòru pa ningun persona keda atras. Mesun importante ku e libertat aki ta e sentido di respèt i kombibensia ku siudadanonan di Boneiru i di rònt mundu. E kombibensia aki ta forma e base pa un sosiedat hustu i seif.

## NOS VISHON

Movementu21 su vishon ta pa krea un Boneiru inovativo ku ta brinda e siudadano tur oportunitat pa desaroyá su mes ampliamente i asina krea un komunidad ku ta karga su responsabilidad, ku ta tuma rienda di su desaroyo den su mes man, ku ta kuida su kultura i medioambiente, ku un espíritu di solidaridat i partisipashon real. Tur esaki komo un proseso pa yega na un berdadero emansipashon. Un Boneiru kaminda kada siudadano por alkansá un grado di bienestar i prosperidat. Pa por alkansá esaki M21 ta boga pa:

- Tur siudadano tin igualdat di oportunitat;
- Mantené prinsipio, norma- i balornan haltu di bida;
- Mantené nos naturalesa i kultura, un medioambiente agradabel i bon kuido di nos bestianan.
- Protekshon igual di lei i sentido di seguridat pa tur siudadano;
- Krea programanan pa mantené nos hendenan salú, tantu spiritual komo físiko.
- Enseñansa i formashon ku ta duna e siudadano e oportunitat pa desaroyá su kapasidatnan optimalmente riba un base kontinu;
- Tur siudadano por tin aksesu na merkado laboral i un entrada hustu;
- Tur siudadano por disponé di e nesidatnan básiko pa por tin un bienestar akseptabel pa su mes i su famia

## NOS NORMA-, BALOR- I KONSEPTONAN

Tur loke tin den e programa aki, M21 ke logra teniendo na kuenta e siguiente norma-, balor- i konseptonan ku nos ta para p'é:

### **Igualdat**

Nos komunidad ta unu inklusivo kaminda tur persona tin e mesun derechinan i debènan i ta digno di tin e mesun oportunitatnan. Komo tal no ta aseptá ningun tipo di diskriminashon.

Mester respetá derechi di otro i interes general ta promé ku interes di grupo i/òf interes individual.

### **Solidaridat**

Solidaridat ta e determinashon firme pa sali na interes komun. Un konsenshi di sosten i kolaborashon di tur ku ta forma parti di e sosiedat i ku ta na disposishon di tur otro pa krea un bida digno pa nos tur.

### **Fraternidat**

Solidaridat ta bai man den man ku fraternidat ku ta impliká tuma responsabilidadat pa kolaborá di un forma ekitativo den bida diario. Mester komprometé pa krea kondishonnan komun pa tur persona por realisá su potensialnan – físiko i spiritual – den un ambiente di respèt pa dignidat humano.

### **Supsidiaridat**

E prinsipio di supsidiaridat ta konsekuensia di desentralisashon gubernamental. Den nos kaso ta desentralisashon di outonomia. Outonomia ta e derechi pa bo mes disidí riba bo asuntunan. Den kaso di Entidat Públiko Bonaire nos tin outonomia kompartí ku Hulanda anto akí e prinsipio di supsidiaridat ta konta: loke nos por hasi nos mes ta hasi i kaminda ta nesesario Hulanda ta yuda nos.

### **Libertat**

Libertat ta e derechi di un persona pa disidí riba su mes komo individuo i e derechi di un pueblo pa disidí komo kolektividat ku ta pensa i aktua. Komo tal e ta un derechi ku ta aplikabel riba tur aktividat humano.

E sistema polítiko efektivo mester garantisá e kondishonnan pa libertat eksistí. Libertat ta bin ku derechinan i debènan. E persona mester asumí su responsabilidadat pa su mes i pa su komunidat.

### **Hustisia Sosial**

For di e punto di bista material, Hustisia Sosial mester krea kondishonnan nesesario pa por satisfasé e nesidadnan básiko manera: alimento, bibienda, paña, salú, edukashon i protekshon sosial. Sin e nesidadnan básiko aki e ta bira difísil pa tin hustisia.

For di punto di bista kultural i spiritual Hustisia Sosial mester garantisá derechinan di e hende ku nos no por lubidá: edukashon, formashon, desaroyo intelektual, uso di siensia i teknologia i respèt pa manifestashon di e realidat kultural étniko di gruponan den komunidat.

### **Demokrasia**

Demokrasia ta un forma di goberná kaminda e pueblo ta skohe su representantenan den gobernashon. E sistema di “trias politika” ku ta repartí e podènan den esun legislativo, esun ehekutivo i esun di kontrola-dó ta sòru pa e balans di poder.

Nos ta rekonosé e sistema demokrátko komo e úniko kapas di krea kondishonnan pa loke ta trata dignidat di e hende i su derechinan fundamental. E sistema mester di atenshon kontinuo pa sigui desaroyé. Algun komponente di e sistema aki ku nos mester duna balor ta: elekshon popular liber i periódikamente, respèt pa minoria, separashon di poder mas efektivo, balans demokrátko ku mas atenshon pa desaroyo lokal.

### **Pluralismo**

Pluralismo ta e diversidat di opinion i interes pero semper ku respèt mutuo, for di kua ta sali ophetivonan pa komunidat riba tereno sosial, kultural i ekonómiko. E ta un kondishon fundamental pa demokrasia.

### **Sosiedat Partisipativo**

E hende mester partisipá den asuntunan di e sosiedat ku e ta forma parti di dje pasivo, aktivo i ekspresivo. P’esei mester krea oportunitat pa e persona por partisipá i influensia den desishonnan di asuntunan di Boneiru.

Mester duna atenshon spesífiko na partisipashon aktivo di nos hóbenan; desishonnan ku tuma awe tin efekto riba futuro di e hóben. Un preparashon fundamental di e hóben ta esensial pa e por tuma over den futuro.

### **Derechinan Humano**

Derechinan Humano ta protehá dignidat di nos tur komo sernan humano. Bo tin derechinan humano pa e simpel echo ku bo ta un ser humano, sin importá bo género, rasa, religion òf opinion polítiko. Ta apliká Derechinan Humano na kualke momentu, na kualke lugá, i pa tur hende meskos pasobra nos ta un komunidat inklusivo. Derechinan humano tin un lugá spesial den leinan.

Derechinan Humano tin prioridat riba Estado, p’esei Estado mester garantisá Derechinan Humano.

### **Interes General**

Interes General ta tur loke ta faboresé e komunidat inkluyendo tantu su siudadanonan komo institushonnan i sistemanan sosial. Interes General ta na promé lugá riba tur otro interes.

## **NOS MANERA DI HIBA KAMPAÑA**

M21 ta atendé ku su kampaña polítiko na un manera honesto, a base di kontenido, argumento i transparensia. Nos meta prinsipal di kampaña ta pa nos bende nos ideanan na e siudadano. Ideanan ku mester krea speransa i trese trunkilidat bèk pa asina konstruí un mihó Boneiru pa nos yunan i nan futuro generashonnan. M21, su direktiva i kandidatonan lo mantené nan mes estriktamente na e siguiente kódigo di kondukta:

1. Den kampaña di M21 no tin espasio pa promesa falsu i/o akshonnan ku ta zona popular pero ku no ta na benefisio di bienestar general;
2. Tur kandidato riba e lista di M21 ta respetá su mes i lo trata tur otro hende ku respèt;
3. Tur kandidato di M21 ta respetá ku votamentu ta un derechi sagrado i ku no por o intentá na kumpra voto;
4. Tur kandidato di M21 lo respetá material di kampaña di otro partido;
5. M21, kaminda mester, semper lo informá outoridatnan kompetente i/o lo sòru pa e pèrmitnan nesesario pa tene aktividat i/o evento di kampaña;
6. M21 lo ta transparente pa loke ta trata finansiamentu di kampaña.

## 2. Nos kompromiso

Aki bou e kompromiso di M21 ku Pueblo di Boneiru pa loke ta trata e puntonan di akshon mas importante pa nos trabou den e próksimo periodo di gobernashon. Pa mas detaye wak kapitulonnan 3 te ku 10.

### **1. Un tim nobo ku polítikonan ku kurashi, konosementu, kapasidá, ku ideanan inovativo i abilidad pa sali na interes di siudadanonan boneriano**

- Tur funshonario pa M21 lo ta kapasidá pa e posishon
- Tur integrante di M21 ta komprometé di ta transparente, humilde i íntegro.
- Interes general ta bai promé ku interes di grupo òf interes personal.
- Un tim ku vishon, basa riba realidat i ku metanan faktibel.

### **2. Desaroyo sosial: pasobra tur hende tin derechi riba un bida felis mester dediká atenshon na integrashon sosial i no diskriminashon.**

- M21 ta bai stimulá partisipashon di hende muhé den tur sektor di nos komunidad.
- Atenshon spesial M21 lo duna na e hendenan desabilitá i lo krea fasilidat i provishonnan pa nan por partisipá kompletamente den nos komunidad.
- Mester introdusí un punto sentral ku ta kordiná tur asuntu di hubentut ku e meta pa brinda mas perspektiva pa e grupo aki.
- Mester tene kuenta ku poder di kompra di nos hendenan en general i esnan vulnerabel en partikular.
- Introdusí mínimo sosial manera e mester ta.
- Kombatí pobresa
- Saneamentu di debe
- Introdusí 'WW-uitkering'
- Mester introdusí un sistema di penshon general basá riba tres pilá, esta e penshun di behes, penshun di trabou i e posibilidat pa un penshun privá. Mester introdusí Algemeen Pensioen Fonds (manera Aruba i Hulanda)
- Establesé un komishon di rekonsiliashon den kua por papia di nos problemanan ku ta dividí nos.
- Atendé bienestar di animal.

### **3. Invertí den hende: formashon, enseñansa, deporte i kultura**

- Evaluá nos sistema di enseñansa i formashon.
- Rekonosé i promové ku nos enseñansa mester ta multilingual.
- Aktualisá enseñansa di profeshon na merkado lokal.
- Trese skol di fishi bèk pa krea empresarionan lokal.
- Introdusí skol di turismo.
- Stimulá estudio den region
- Mas atenshon pa Boneiru komo parti di kuríkulo.
- Invertí den fasilidatnan i material deportivo di standart internashonal.
- Krea fasilidat pa talentonan deportivo haña sosten finansiero den preparashon pa bira profeshonal.
- Invertí den fasilidat deportivo pa nos hendenan desabilitá
- Invertí den un bon maneho di Arte i Kultura di Boneiru

### **4. Invertí den salú di hende**

- Pone énfasis riba prevenshon.
- Evaluá maneho di ZVK i atendé ku e resultado - konsehonan di e rapòrt ei
- Evaluá e struktura i maneho di kuido di Entidat Públiko Boneiru.
- Akohida pa rehabilitashon.
- Akohida pa pashèntnan ku malesa mental.
- Reforsá i integrá kuido básiko riba nivel di barío.
- Usa traduktornan pa pashèntnan ku ta papia papiamentu/spañó.
- Mihó koperashon den Reino riba tereno di salubridat.
- Reorganisá makutu básiko pa e ta mas salú.
- Evaluá e maneho di botikanan.
- Evaluá salú mental di nos hendenan.

## **5. Un komunidad ku ta konsistí di barionan integral desaroyá den kua bo ta sinti bo sigur atrobe.**

- Krea barionan ku infrastruktura na òrdu, posibilidat di rekreashon kaminda grandi i chikitu por sinti nan na kas.
- Krea barionan ku aksesu na tur facilidat pa habitante.
- Mehora merkado di bibienda.
- Bin ku un plan nashonal di bario inkluso redefinishon kua ta nos ba-rio-nan riba e isla i un Sentro di Bario pa kada bario.
- Introdusí konseho di bario un plataforma pa habitantenan di bario mes ta responsabel pa mantenshon di nan bario. Nan ta doño di nan bario.
- Reorganisá transporte públiko i introdusí transporte públiko pa tur hende i fasilitá komunikashon entre barionan.
- Krea mas aksesibilidat entre islanan ABC konsiderando esaki transporte públiko.
- Baha preis di ticket di avion pa hasi biahamentu entre islanan ABC dor di usa parti di e tourismtax pa introdusí “korting” na nos siudadanonan i studiantenan
- Mehora infrastruktura di sentro di Kralendijk.
- Introdusí inspektor di bario i pa Kralendijk (‘city inspectors’).

## **6. Un gobièrnu pa tur siudadano.**

- Tur siudadano ta konta; revisá nos leinan i evitá diktadura di mayoria.
- Evaluá nos sistema polítiko.
- Evaluá nos Konseho Insular.
- Mas partisipashon di gobièrnu di Entidat Públiko Boneiru den gobièrnu di RCN.
- Mas partisipashon di hóbenan den desishonnan
- Mas transparensia den desishonnan di Gobièrnu. Fortifiká institutonan estatal.
- Invertí den i fortifiká kuerpo di ámtenar.
- Instituí Konseho di Bario.
- Profundisá konosementu polítiko di Kolegio Ehekutivo i Konseho Insular.

- Koperashon ku “VNG”.
- Manehá propiedatnan di Gobièrnu pa medio di un kompania.
- Konstruí un edifisio sentral pa gobièrnu(nan).
- Krea un plataforma desentral pa hiba gobernashon den bario i krea partisipashon di habitantenan di bario.
- Instituí plataforma di diálogo nashonal pa krea konsenso riba desaroyo di Boneiru
- Kambio di struktura estatal ta posibel solamente via di un desishon di 2/3 parti (67%) den konsulta ku pueblo.

## **7. Desaroyo sostenibel ku atenshon pa naturalesa, medioam-bien-te i bienestar di animal.**

- Promové bienestar di animal.
- Plan di maneho pa medio ambiente.
- Invertí den Naturalesa i medioambiente
- Mehora kalidat di awa den suela.
- Sera akuerdo di klima ku den Haag’
- Energia duradero i pagabel
- Konekshon riba ret internashonal di gas.
- Evaluá i eventualmente adaptá e lei di medioambiente i introdusí sanshonnan realístiko pa esnan ku falta ku nos medioambiente. M21 ta bai ta serio ku konservashon di nos medioambiente komo e materia prima di nos desaroyo ekonómiko sostenibel i duradero.
- Introdusí maneho di energia ku ta redusí “stikstof” i garantisá suministroo di energia pagabel

## **8. Garantia di nos propio kuminda salú i pagabel.**

- Soru pa awa pagabel.
- Desaroyá un sentro di konosementu pa krio, agrikultura i peska.
- Alsa nivel di Krio.
- Desaroyá área di agrikultura.



### **9. Duna sosten na e kunukero pa por komersialisá su produkshon.**

- Promové i sostené empresarionan den e mundu di produkshon lokal di kuminda riba tereno di plantashon, krio di bestia i peskeria.
- Kunuku mester produsí.
- Introdusí sistemanan inovativo di produkshon di kuminda.
- Promové koperativismo den produkshon di nos mes kuminda.
- Sòru pa formashon i entrenamentu pa nos hendenan mes por produsí.
- Promové i sostené akuakultura.

### **10. Un ekonomia ku ta kana pa tur hende.**

- Introdusí un direktorado di Ekonomia ku inkluso ta kordiná ku kompanianan di utilidat i infrastruktura pa krea un ambiente favorabel pa hasi negoshi.
- Rápidamente establese konfiansa bèk den ekonomia, fortaleza sektornan ku ta generá divisa i un maneho ku ta respirá konfiansa i kresementu sostenibel.
- Un vishon pa Turismo
- Turismo Krusero
- Studia posibilidatnan pa BOPEC i/òf terenonan di BOPEC.
- Atendé ku Cargill pa sera un mihó dil pa eksplotá Salíña.
- Stimulá ekonomia den barío via kreamentu di negoshi chikí.
- Krea fondo di garantia pa empresa chikí.
- Krea (mas aksesu na) un banko di desaroyo pa i di Boneiru.
- Invertí den infrastruktura den un forma profeshonal pa krea mas kupo di trabou.
- Desaroyá aeropuerto i hafnan komo pila ekonómiko.
- Invertí pa subi e kapasidat di hende pa haña un trabou komo un instrumento pa kombatí pobresa
- Palabrá (tripartit) akshonnan pa subi produktividat i introdusí CAO pa sektor (“mantel-CAO”)
- Krusa frontera i nombra representante di ekonomia den eksterior

- Krea ofisina di diáspora pa hasi mihó uso di talento di yunan di tera bibá afó
- Introdusí leinan di kompetensia i di protekshon di konsumidó pa salvagardiá kompetensia sano entre komersiante i derechi básiko di konsumidó.
- Mantené kompanianan di gobièrnu na distansia for di polítika.

### **11. Un Boneiru Seif.**

- Siguridat na trabou.
- Prepará pa kalamidat.
- Prevenshon di kriminalidat den Barío.
- Mantenshon lei i reglanan.

### **12. Relashon ku eksterior.**

- Un bon relashon ku Hulanda i den Reino i mundu basá riba madures.
- Bini ku un direktorado di struktura estatal i relashonnan den Reino ku representante na Hulanda.
- Mester evaluá struktura estatal kada 5 aña manera a palabrá i ahustá si ta nesesario.
- Relashon entre Boneiru i Hulanda mester drenta un era nobo; un relashon basá riba madures, karga nos propio responsabilidat i na interes di Boneiru, un relashon realístiko i ku vishon.
- Hasi mihó uso di embahadanan di Reino pa promové hasimentu di negoshi
- Hasi mihó uso di nos status di miembro asosí di Union Oropeo
- Buska maneranan di koperashon den Karibe (Caricom) i ku nos hemisferio, ku atenshon spesial pa Sur Amérika.
- Mihó uso di talentonan den Diáspora Boneriano.

### 3. M21 i desaroyo sosial

#### Igualdat di oportunidat pa tur hende biba un bida felis



Tur pais den Nashonnan Uní ta para pa un mundu hustu, rasonabel, tolerante, habrí i sosialmente inklusivo kaminda por kumpli ku nesidat di esnan mas vulnerabel. Na fin di sèptèmber 2015 Hulanda tambe a firma e Ophetivonan di Desaroyo Sostenibel (SDG's) di Nashonnan Uní:

*"Nos ta desidido pa, entre awor i 2030, mundialmente trese un fin na pobresa i hamber; pa kombati desigualdat den i entre paisnan; pa konstruí sosiedatnan pasífiko, hustu i inklusivo. Nos ta desidido pa trese un fin na pobresa i hamber, den tur nan forma- i dimenshonnan, i sigurá ku tur hende por desaroyá nan potensial den su totalidat den dignidat i igualdat i den un ambiente salú."*

Pa M21 desaroyo sosial ta ankrá den e pensamentu ku tur hende den nos komunidad mester tin igualdat di oportunidat pa hiba un bida felis den kua e por desaroyá su mes optimalmente. Den e kuadro aki mester redusí desigualdat i diskriminashon i stimulá toleransia, harmonia i kombibensia entre tur grupo. Gruponan ku mas mester di atenshon, esta nos penshonadonan, mucha i personanan ku desabilitat, mester haña esaki tambe. Den kuadro di e akshon ku mester tuma pa pone nos hendenan finansieramente bek riba nan pia, mester sòru ku no ta kousa mas deterioro sosial den nos komunidad, prinsipalmente pa gruponan mas vulnerabel. Tambe ta importante pa e trato ku ta duna animal ta basá riba nan bienestar. M21 ta proponé e siguiente akshonnan:

#### **Introdusí mínimo sosial**

Gobièrnu Hulandes te ku awe no ke stipulá un mínimo sosial pa Boneiru. Esaki ta kontra di e "Ophetivonan di Desaroyo Sostenibel" di Nashonnan Uní. M21 ta dispuesto pa asumí responsabilidad i atendé debidamente ku Hulanda p'e kumpli ku su obligashon conforme e "Ophetivonan di Desaroyo Sostenibel di Nashonnan Uní.

#### **Kombatí pobresa**

Trabou mester paga (Werk moet lonen). E mihó manera pa redusí pobresa ta dor di empleo ku salario hustu. Empleo ta keda kreá solamente ora ekonomia krese i ora invertí den enseñansa/formashon di nos pueblo. M21 ta bai kombatí pobresa prinsipalmente dor di subi kapasidat di empleo di nos hendenan, esta sòru pa nan tin e instrumento pa haña i mantené un empleo. Esaki ta eksihí invershon den "on the job training" i "life coaching".

#### **Saneamentu di debe**

M21 tin komo prioridat pa yuda esnan ku a kai den debe sali for di esaki pa medio di un maneho di saneamentu di debe. Ku saneamentu di debe nos ta ofresé habitantenan ku debe haltu un perspektiva pa sali for di nan debenan.

- Kuminsá ku un sistema di Registro di Krédito. Esaki ta protehá habitantenan ku tin hopi debe. Habitantenan ku ta registrá den e sistema di Registro di Krédito no por hasi otro debe tanten ku nan ta registrá den e registro aki.
- Atendé ku persona-/instansianan ku ta fia hende sèn kontra un interes sumamente haltu. Esei ta pone ku habitantenan ku hopi debe ta resultá ku debe mas grandi ainda.
- Servisio di impuesto tambe tin un papel di hunga den esaki: mester evalua introdukshon di "Beslagvrije voet".

#### **Introdukshon di un lei di fasilidat na momentu di desempleo**

M21 ta sostené introdukshon di Fondo di Desempleo. Esaki lo hasi posibel ku esun ku pèrdè trabou fuera di su boluntat por pidi un pago pa motibu di desempleo (WW-uitkering).

### **Formashon kòrtiku ku garantia di trabou i guia na pia di trabou**

Regularmente doñonan di trabou ta buska trahadó profeshonal i personal ku formashon práktiko for di eksterior. Doñonan di trabou ta bisa ku nan ta hasi esaki pa motibu di eskases di personal kalifiká na Boneiru. M21 ke pa tur boneriano haña oportunitat pa un trabou adekuá.

- Ofresé formashon práktiko ku garantia di trabou na personanan ku no tin trabou. Di e manera ei nan tambe por bai traha den kuido na kas, den konstrukshon i den sektor hotelero i turístiko.
- Ofresé guia i rekapasitashon na profeshonalnan den e sektornan menshoná aki riba.

E puntonan menshoná aki riba ta konta tambe pa habitantenan ku limitashon intelektual leve i/òf limitashon físiko. Nan tambe tin derecho riba un trabou i un bida desente. Den esaki M21 ta di opinion ku Gobièrnu por duna promé ehèmpel.

### **Promové integrashon sosial**

M21 ta bai promové integrashon sosial atraves di kursonan obligatorio pa migrantenan sera konosí ku nos kultura i nos historia den mas amplio sentido di palabra.

### **Sistema di penshun**

Mester introdusí un sistema di penshun general basá riba tres pilá: esta e penshun di behes, penshun di trabou obligatorio i e posibilidat pa un penshun privá. Mester bini ku un Algemeen Pensioen Fonds meskos ku Aruba i Hulanda tin.

### **Atenshon pa penshonadonan**

Forsa di kompra, esta e balor di e dòler mester ta un punto di atenshon pa nos penshonado, esaki pasobra e penshonado a duna su labor atraves di añanan na komunidad. Pa e por biba un bida desente e digno den su di tres fase di bida e mester tin un entrada mínimo mas por konta riba adaptashon di su entrada na oumento di kosto di bida (mantenshon di forsa di kompra). M21 ta boga pa deskuentonan spesial pa nos penshonadonan. Sondia posibilidatnan pa krea polítika ku ta sostené poder di kompra di nos hendenan.

### **Atenshon pa hendenan ku desabilidadat**

M21 ta bai lucha pa enseñansa spesial i asina kontribuí na hisa e grado di independensia di nos hendenan ku meresé atenshon spesial. Pa loke ta nos hendenan desabilitá mester invertí den infrastrukutura i fasilidatnan pa hasi nan mobilitat mas fásil den nos komunidad. i lugánan reservá. M21 ta boga pa e hendenan desabilitá físikamente tambe por tin aksesu na merkado laboral. Den esaki Gobièrnu lo tin un ròl importante.

### **Komishon di Rekonsiliashon**

E grado di divishon den nos komunidad tin su rais den pasado i ta keda alimentá pa finnan polítiko. E echo ku no a atendé ku e problema aki, ta hasi difísil pa traha bai dilanti. P'esei ta nesario pa establese un komishon den kua por papia i diskutí di nos problemanan i yega na solushon.

### **Atenshon pa bienestar di animal.**

Mester revisá i eventual kambia leinan ku tin pa loke ta trata bienestar di animal. Bienestar di animal ta enserá kumpli ku nesidatnan di un animal i sòru pa nan bienestar físiko i mental. Mester krea un infrastrukutura di kuido ku ta sòru pa animalnan den perkansia haña e kuido nesario i rehabilitá si ta nesario.



## 4. M21 i formashon i enseñansa, deporte i kultura

### Siudadano empoderá, sano i konsiente

M21 ta para pa un enseñansa i formashon ku ta hasi posibel pa e hende bira konsiente di su talento i ta haña espasio pa desaroyá su mes optimalmente. M21 ta boga pa inkorporá den kuríkulo di nos enseñansa e materia di nos herensia históriko kultural. Esaki ta pa fortifiká e outoestima di nos hendenan pa realisá i rekonosé nan identidat Boneriano. M21 ta kombensí ku mester konsentrá riba kalidat di enseñansa i formashon pa NOS hendenan i ta proponé e siguiente akshonnan:

#### Reevaluá nos sistema di enseñansa

Nos sistema di enseñansa, e sistema hulandes, mester keda totalmente evaluá riba implementashon i ehekushon pa determiná te kon leu esaki ta kumpli ku e metanan di desaroyo komo isla i e tipo di siudadano ku nos ke krea/nos mester pa ta eksitoso den futuro

- Instituí un komishon pa hasi investigashon i evaluashon di nos sistema aktual di enseñansa na Boneiru i traha un rapòrt ku e resultado i tambe konsehonan kon pa sigui.

#### Rekonosé ku nos enseñansa mester ta multilingual.

Mirando for di e punto di bista ekonómiko (turismo), kultural (multikultural), sosial (integrashon), M21 ta di opinion ku desaroyo di nos muchanan ta mihó sirbí den un sistema di enseñansa multilingual. Esaki lo hasi nos futuro generashon fuerte den henter mundu.

#### Ahustá enseñansa pa profeshon na merkado laboral lokal

Ta importante pa hubentut boneriano despues di kaba studia por haña trabou ku e diploma ku nan a optené. P'esei e materianan di Komunidat di Skol Boneriano mester konektá ku merkado laboral lokal manera por ehèmpel trabou den konstrukshon, téknika, agrikultura, peska, krio di bestia, turismo, ser empresario i.o.

- Traha huntu ku skolnan superior i universidatnan rekonosé den region o na Oropa relashoná ku por ehèmpel agrikultura i estudionan di medioambiente.
- Enseñansa i formashon pa trabou den rekuperashon i mantenshon di naturalesa i turismo sostenibel.
- Introdukshon di enseñansa pa empresario. Enseñansa pa empresario ta kontribuí na konfiansa propio di studiantenan i na hasi uso di oportunitatnan ku ta presentá. E ta yuda tambe ku pensa enfoká riba solushon i ku desaroyo di nan perseveransia. Tambe e ta ofresé studiantenan boneriano mas posibilidat riba merkado laboral ora nan terminá e estudio aki.
- Enseñansa mester promové proyektonan investigativo pa bini ku inovashon den nos desaroyo.
- Promové estudionan ku mira riba loke nos ke desaroyá den futuro. P.e. si nos ke desaroyá energia sostenibel, bin ku estudionan den e ramo aki.

#### Introdusí skol di fishi

Tin hende ta sumamente eksitoso den uso di nan mannan i trabou práktiko. Pa e hendenan aki mester tin posibilidat atrobe pa siña un fishi. Ta nesesario introdusí skol di fishi bèk pa duna un respondi adekuá na nesesidatnan den nos merkado laboral i pa krea empresarionan lokal independiente.

- Habri diálogo ku esnan konserní pa por atendé e tópiko aki
- Instituí loke ta nesesario pa por introdusí skol di fishi atrobe na Boneiru.

#### Skol di turismo

M21 ta boga pa rebibá e pensamentu di konstruí un skol turístiko pa krea profeshonalnan den e área di e pila mas importante di nos ekonomia.

#### Stimulá studia den region

Tin hopi posibilidat pa studia den region. P'esei M21 ta boga pa:

- Oumentá e beka mará na prestashon pa studia den region.
- Invitá mas skol den region pa partisipá na e "Study & Career Event" anual di Boneiru.
- Organisá biahe di studio den region pa studiante. imágen

#### Duna mas atenshon na Boneiru den kuríkulo

Nos ta biba na Boneiru. P'esei ta importante pa enseñansa boneriano ta konektá estrechamente ku konteksto lokal.

- Laga tur lès tokante naturalesa, medio ambiente i mundu di animal tin konekshon ku Boneiru. Stinapa por duna sosten den esaki. Ta importante pa hubentut siña kon importante naturalesa i mundu di animal ta pa Boneiru.
- Duna atenshon amplio na historia i herensia kultural di Boneiru.
- Trata komunidat boneriano ampliamente durante "maatschappij-leer" (siensia di komunidat i siudadania).

### **Limitá “brain drain” boneriano**

- Stimulá studiantenan boneriano pa hasi nan stazje na Boneiru (“siempre y cuando” e sitio di stazje tin un bon guia pa e studiante).
- Bonerianonan ku kaba studia i bin traha pa Gobièrnu di Entidat Públiko Bonaire ta bini na remarke pa e areglo “Overname studieschuld BES”, loke ta nifiká ku komo ámtenar e ta haña parti di su debe di studio bèk òf pagá dor di EPB.
- Stimulá un programa di “Traineeship” pa studiantenan boneriano den sektor komersial públiko.
- Adaptá e areglo di repatriashon di Entidat Públiko Bonaire.
- Kuminsá duna ayudo pa debe di studiantenan ku tin debe di studio haltu.
- Maneho di diskriminashon positivo pa loke ta trata bonerianonan ku a kaba studia. Den kaso di kapasidat igual bonerianonan tin preferensia.
- Aserka banko- òf otro instansianan pa duna profeshonalnan ku ta regresá un asina yamá “startershypotheek” pa por konstruí nan propio kas. Den esaki Gobièrnu mester koperá pa pone tereno disponibel den sentido ku durante nan estudio nan tambe ta bini na remarke pa pidi i haña un tereno i tambe ku fondo di garantia (“hypotheekgarantie”).

### **Krea fasilidatnan pa deporte.**

Moveshon ta importante pa salú. Hendenan ku ta hasi deporte i move sufisiente ta redusí e chèns riba keho di salú. M21 ta haña importante pa sigui stimulá tur e variedat di deporte ku tin na Boneiru i ta boga pa e siguiente akshonnan riba e tereno aki:

- Re-introdusí deporte di i den bario.
- Formulá i ehekutá un maneho di deporte i su atministrashon pa Boneiru.
- Traha, drecha i/òf mantené kluphùis- i fasilidatnan di deporte.
- Sostené deportistanan i klupnan di deporte ku ta bai representá Boneiru den eksterior.
- Introdusí un beka di deporte pa deportistanan ku mas talento.
- Reaktivá, reorganisá i profeshonalisá Federashon di Deporte Bone-ria-no.
- Invertí den fasilidat di deporte pa hendenan desabilitá.
- Pone sufisiente plaka disponibel riba presupuesto di EPB pa por aten-dé manera debe ser ku deporte na Boneiru i esnan ku ta bai representá nos den eksterior.
- Invertí den un pista pa kareda seif.

- Invertí den un “Skate Park” safe.
- Tuma inisiativa pa hasi e trámitenan nesesario pa deportistanan boneriano por representá Boneiru bou di i ku bandera boneriano.
- Konstruí un pisina deportivo olímpiko.
- Introdusí landamentu eskolar na tur skol atrobe.

### **Arte i kultura como fundeshi di nos sivilisashon**

Arte i kultura ta e forman di ekspreshon básiko di desaroyo personal i sosial. Esaki ta e úniko rason pakiko henter Boneiru lo mester por disfrutá di e variedat di arte i kultura di e isla i tin aksesio na kolaborashon regional i internashonal. E sektor kreativo meresé mas rekonosementu i un mihó posishon sosial. M21 ta rekonosé e importansia di i ta boga pa validá e sektor di arte i kultura invulkrando tur ku tin parti na e sektor aki. E sektor di arte i kultura ta inkluí organisashonnan ku ta partisipá den kreashon, presentashon i/òf konservashon di arte i kultura. Arte por ta material, manera un monumento, un pintura òf un archivo, òf no-material manera un forma di tene fiesta, artesanía òf baile. Arte i Kultura ta uni nos hendenan i por tin un efekto vinkulante entre diferente generashon òf grupo di un poblashon. Arte i kultura ta apelá riba nos imaginashon i ta importante pa nos por ekspresá nos mes i pa por tin empatia pa otronan. Arte i kultura ta stimulá turismo i industria.

Pa por salbuardiá nos herensia ku perspektiva nobo, M21 ta boga pa e siguiente puntonan di akshon:

- Reservá sufisiente finansiamentu struktural riba presupuesto di Boneiru pa preservá i mantené nos patrimonio kultural.
- Krea un struktura nobo pa tur instansia i institushon involví ku arte i kultura por traha huntu.
- Studia posibilidat pa produkshon di arte keda (parsialmente) finansiá dor di gobièrnu.
- Krea un plataforma pa por digitalisá, kompartí i komuniká nos historia mihó.
- M21 ta bai promové aktivamente e sektor kultural, partikularmente e institushonnan di museo i archivo, e apartamentunan di gobièrnu, pa medio di investigashon, traspaso i eksibishon di nos historia.
- Boga pa un instituto di un museo nashonal.
- Pro pa fomentá otro institutonan kultural den nos patrimonio pa por ofresé espasio kaminda nos hendenan por siña nos historia, komprendé nos presente i pensa riba nos futuro.
- Lo enkargá pa agregá tur monumento di Boneiru na e wèpsait di herensia di Reino, aksesibel pa tur nos hendenan for di nan kas.
- Lo hasi e skema di supsidio pa preservá nos patrimonio mas visibel i aksesibel pa tur instituto lokal.
- Lo traha riba opshonnan di finansa pa hasi nos monumentonan mas sostenibel i aksesibel.

## 5. M21 i salubridat

### Un pueblo salú ta un pueblo felis i produktivo

Pa M21, un pueblo salú ta un kondishon nesario pa por sigui desaroyá nos isla. Nos ta para pa un poblashon ku un estilo di bida saludabel, kaminda ku e diferensianan grandi di salú basá riba nos status sosioekonómiko a keda eliminá. Den e kuadro di salubridat M21 ta proponé e siguiente akshonnan:

#### Prevenshon i mas prevenshon

E úniko manera pa frena e índise muchu haltu di sobrepeso i e kondishonnan relatá na esaki manera preshon haltu, diabétis, malesa di kurason i ader i tambe kanser ta pone mas énfasis for di na skol riba e aspekto preventivo dor di trese un kambio den nos estilo di bida, entre otro kome i bebe salú i move (físikamente) mas. Mester invertí den deporte, infrastruktura adekuá pa hende kana i hasi fruta i berdura aksesibel i pagabel dor di entre otro mas produkshon lokal di agrikultura. M21 ta bai studia kon por hasi komestibelnan saludabel manera fruta i berdura parti di e makutu básiko.

#### Drecha maneho di kuido di Entidat Públiko Boneiru

Pa hinter e kadena di salubridat funshoná na un manera responsabel i kalidat haltu, mester tin un sistema ku kontinuamente ta monitor, investigá i produsí sifranan pa loke ta trata nos estado di salú i ademas ta yuda formulá maneho riba tur tereno di salubridat. Pa logra un sistema asina mester reorganisá GGD, hasié un entidat ku ta monitor, investigá, dokumentá, publiká sifranan i yuda formulá maneho pa loke ta trata nos estado di salú.

- Mester hasi un sondeo di e státùs di salú mental di nos hendenan.
- Evaluá maneho di botikanan.
- Evaluá Struktura di kuido.

#### Akohida pa pashènt ku mester rehabilitá

Tin diferente kaso di pashènt ku mester rehabilitá pa motibu di aksidente òf malesa. Aktualmente hopi biaha rehabilitashon mester tuma lugá na Kòrsou kaminda e pashènt no tin famia. Un sentro di rehabilitashon na Boneiru por yuda den esaki.

#### Akohida pa kuido spesial mental permanente.

Meskos ku pashènt pa rehabilitashon tin pashèntnan ku mester di kuido permanente pa motibu di malesa mental. Tin akohida pa kuido spesial físico pero no tin pa kuido mental. E pashèntnan aki tin ku bai Kòrsou pa tal kuido kaminda nan no tin famia pa bishitanan i sostené nan.



#### Integrá kuido básiko

Mester reforsá i integrá kuido básiko riba nivel di barío. Tur e integrantenan (e.o. dòkter di kas, dietista, edukadó físico èts.) ta involukrá i ta partisipá aktivamente den programanan di prevenshon.

#### Hasi uso di traduktornan huramentá pa sostené pashèntnan ku ta papia papiamentu i spañó.

Ta hopi difísil pa pashèntnan ku no òf apénas ta dominá hulandes por komuniká ku dunadónan di kuido ku ta papia hulandes. Pa motibu di falta di komunikashon mutuo bon i klarito hopi biaha kuido médiko ta forma un menasa pa e pashèntnan aki. E situashon aki ta kondusí na fayó den komunikashon ku tur e konsekuensianan ku esaki por tin. Esaki no por sigui asina. M21 ta boga pa sufisiente traduktor huramentá pa sostené e pashèntnan aki. Traduktornan huramentá tin un obligashon di sekresia kontrali na kualke otro empleado.

### ***Mas i mihó koperashon den Reino***

Hopi pashènt ku no por haña tratamentu na Boneiru ta bai Colombia pa nan operashon i/òf tratamentu. Aya tambe hendenan ku no ta dominá spañó bon ta dal den un barera di idioma. Nos Hermana islanan Aruba i Kòrsou tambe tin hospitalnan bon kaminda por hasi un gran parti di e operashon i/òf tratamentunan aki:

- E operashonnan ku por hasi na Aruba òf Kòrsou; laga hasi nan riba e islanan ei mes. Riba e islanan aki no tin kestion di barera di idioma i nan ta mas serka kas.
- Ofresé mas sosten na pashèntnan ku a eksperensia daño komo konsekuensia di operashon i/òf tratamentu den eksterior.
- Tur boneriano ku ta preferá hasi operashon na Hulanda enbes di na Colombia, mester por hasi e eskoho ei.
- Adaptá e artíkulo 10.4 di tal forma ku e pashènt -enbes di paga tur gastu su mes i despues deklará e gastunan aki na ZVK- ta haña un karta di garantia ora e usa e artíkulo aki pa bai dòkter pafó di Boneiru.
- Hasi e trámitenan pa por kumpra seguro adishonal posibel.

### ***Reorganisá e makutu básiko salú pa Boneiru***

Mayoria alimento ta importá na Boneiru. Esaki ta pone ku preisnan ta haltu. Pa e tipo di alimento den un makutu básiko ta stipulá un tarifa máksimo. Asina nos no por kome salú na un preis pagabel.

- Mester stipulá un makutu básiko salú i pagabel pa Boneiru.
- No mester tin impuesto di importashon riba fruta i berdura den e makutu básiko.

### ***Un solushon duradero pa atendé ku sushi na Boneiru***

Landfillnan vooral esun na Lagun ta un menasa pa salú di hende. Mester bini ku un plan definitivo pa atendé ku sushi i landfill.

- Pone “incinerators” funshoná manera mester ta inkluso si tin ku mudanan.
- Sanea landfillnan i krea landfill di akuerdo ku normanan internashonal.
- Krea un maneho di sushi basá riba “reuse, reduce i recycle” di un manera preventivo.



## 6. M21 i desaroyo integral di nos bario- i bisindarionan

### Nos barionan ta parti fundamental di nos bisindario i infrastruktura

E infrastruktura aktual di Boneiru por ta mihó. Durante e añanan tras di lomba Boneiru a krese enormemente. Segun espektativa ta bai bira mas drùk ainda. Tanten ku nos ta anda sabí ku nos infrastruktura nos por atendé bon ku e impakto di esaki. Un bon atendentu ku infrastruktura tin atenshon pa tantu logístika komo pa kalidat di e bisindario.

Atenshon pa kalidat di e bisindario ta enserá ku nos no mester enfoká solamente riba infrastruktura shinishi. Bou di infrastruktura shinishi ta kai edifisio, kaminda, asera i semehante. Netamente na Boneiru kaminda naturalesa ta hunga un ròl importante, infrastruktura bèrdè ta di importansia. Infrastruktura bèrdè ta elementonan di paisahe ku ta forma parti di infrastruktura shinishi. E parti bèrdè, spesialmente palu, ta redusí strès di kalor den solo kayente. Palu ta sòru pa sombra. Palu ta filtra aire. Banda di esei hendenan ta sinti nan mes mas felis i mas relahá den un ambiente bèrdè. Un infrastruktura bèrdè no ta solamente planta palu den sentro di siudat. E ta nifiká tambe kurá mas bèrdè di nos habitantenan i mata bèrdè na fachada di kas i riba pòrch. Na momentu di konstrukshon riba un parsela mester tene un parti di e parsela bisina tambe bèrdè i ku vegetashon. Banda di Entidat Públiko Boneiru, empresanan i partikularnan tambe mester aportá na un infrastruktura mas bèrdè. Un bon koperashon ta kondusí na resultado bunita.

Pasobra Boneiru ta kresiendo asina rápido, nos ta konstruí mas. Esaki ta pone ku prinsipalmente infrastruktura shinishi ta dominá, ku komo konsekuensia ku suela ta bira mas duru. Nos isla ta bira mas seku i mas kalor. M21 ta di opinion ku na Boneiru nos mester duna mas atenshon na nos barionan i nan infrastruktura. Esaki mester sosodé di un manera sostenibel:

#### Mehorá e infrastruktura aktual i hasié mas bèrdè i mas aksesibel

- Averiguá si e plannan di parselashon aktual ta vigente ainda. Si ta nesesario mehorá i adaptá nan.
- Traha kaminda na un manera sostenibel. M21 lo investigá si kaminda di otro material por ta aplikabel na Boneiru tambe i si nan ta dura mas ku kaminda di asfalt tradishonal.
- Traha kaminda pa baikel ku sélula solar. Ku e energia ku generá por laga lus di kaya sende. Por karga outo i bús eléktriko tambe ku e energia aki.
- Pone asera seif den áreanan residencial. E ora ei siudadanonan por kana mas seif di A pa B. Hasi infrastruktura di Boneiru mas aksesibel pa personanan ku limitashon (físiko).
- Hasi uso di material moderno. Pone klenku den kaya di tera den barionan ku ta ful konstruí. Ta mas fásil pa mantené klenku i nan ta resistente kontra tur influensia di wer.
- Introdusí un maneho di infrastruktura bèrdè. Mas bèrdè lokal den Kralendijk. Mas bèrdè lokal den barionan. Protekshon di nos áreanan bèrdè. Planta mas palu lokal ku ta resistente na nos klima
- Krea fasilidat pa rekreo den tur bario.
- Traha plan di maneho pa nos sistema di desagwe. Nos tin ku tene kuenta ku nos desagwe.
- Formulá i ehekutá bon plannan di mantenshon. Mantenshon di nos infrastruktura ta importante si nos ke pa esaki dura mas largu.

- Introdusí inspektornan di bario (“city inspectors”) pa identifiká problemanan den infrastruktura, traha plan pa remediá esakinan i sòru pa ehekushon.

#### Mehorá merkado di bibienda na un manera sostenibel

Bibienda ta muchu mas ku un kas den un bario. Aspektonan di deporte, rekreo, integrashon, komersio, espasio bèrdè mester haña mas atenshon. P’esei mester bini un plan nashonal di bario i pone medionan finansiero i humano pa konkretisá esaki. Merkado di bibienda na Boneiru ta hopi pèrtá. Pa e motibu aki preisnan a subi enormemente. Banda di esei mayoria di e bibiendanan no ta konstruí na un manera sostenibel. Pa motibu di kambionan klimatológiko enorme ta importante pa konstruí na un manera ku entre otro ta resistente kontra orkan. Mester rekonsiderá (sigui) destruí naturalesa pa traha kas/bario nobo miéntras ku nos sentronan urbano debidamente tin espasio pa traha kas. Ademas mester tuma na kuenta ku tin hopi kas, inkluso kas na paira, pará bashí pa hopi aña largu. No por ta asina ku tin sentenáres di kas pará bashí miéntras tin un lista di espera pa bibienda. Mester regla den lei medidanan ku Gobièrnu por tuma kontra di e doñonan di e kasnan aki.

- Konstruí mas bibienda pagabel pa ‘starter’. Konstruí e kasnan aki na un manera mas sostenibel posibel (energia alternativa), teniendo kuenta ku mas vegetashon den bario.
- Konstruí apartamentu di hür sosial. Tin un pedida grandi pa kas di hür sosial. Na e momentunan aki tin un retraso pa loke ta trata kas di hür sosial ku mester atendé ku fervor. E 500 kas di hür ku FCB ta bai konstruí, no ta sufisiente.
- Konstruí kas pa hende grandi, kaminda hende grandinan por biba riba nan mes. E kasnan aki ta kontené fasilidatnan, den kua nan por biba na un manera relahá. Meta di esaki ta pa ofresé un mihó bida pa e grupo di hende grandi ku nan kantidat ta oumentando.
- Konstruí kas pa hende ku limitashon. Asina nan ta haña oportunidat pa biba mas riba nan mes.
- Konstruí kas di studiante pa studiantenan boneriano i studiantenan for di region. E kasnan pa studiante aki ta adekuá pa stazjèr for di eksterior tambe.

#### Plan nashonal di bario

Mester bini ku un plan nashonal di bario inkluso definishon di barionan nobo ku nan sentro di bario.

#### Introdusí Konseho di bario.

M21 ta bai introdusí konseho di bario. E konseho di bario ta wòrdu skohe demokrátikamente. E ta responsabel pa trabounan ku mester tuma lugá den e bario. E konseho ta traha su presupuesto ku Konseho Insular ta akordá i pone fondonan disponibel pa ehekutá esaki. Hendenan di bario ta responsabel pa nan bario.





### **Mehorashon di infrastruktura den sentro di Kralendijk**

Infrastruktura den sentro di Kralendijk por ta mihó. E situashon di stashoná outo mas i mas ta sali for di man.

- Introdusí “city inspector”.
- Hasi investigashon relashoná ku konstrukshon di un lugá di stashoná outo den sentro di Kralendijk.
- Pone tualèt públiko bon i limpi den sentro di siudat pa hendenan lokal i turistanan krusero.
- Planta mas palu i mata lokal den sentro di siudat. Pone mas mata na fachadanan.
- Averiguá si e vishon pa sentro di siudat ta sufisiente aktualisá ainda. Si ta nesario adaptá esaki.

### **Baha preis di ticket di aviashon**

Preis pa biaha entre isla nan ABC ta hopi haltu. Mester redusí e preis di ticket pa por sòru ku biahamentu ta keda pagabel pa boneriano nan. Lo usa un parti di e impuesto di turista pa introdusí un ‘fondo di aviashon’ i usa e sèn aki pa kubri un parti di e preis di ticket pa suidadano i studiante. Miéntras ku ta hasi esaki lo sigui buska mas fondo pa por kubri e gastu nan aki strukturalmente i tambe bai na mesa ku Hulanda pa wak kon por bin ku eksigensia pa tur aerolínea pa por tin mas kontròl riba preis di ticket i tambe riba e stulnan disponibel i lo wak tambe e posibilidat pa introdusí un rebaho spesial pa nos studiantenan na Hulanda.

### **Reorganisá transporte públiko i introdusí transporte públiko general**

Boneiru no tin transporte general públiko. Ku partnernan envolví mester yega na un transporte públiko pagabel, basá riba normanan di efisiensia di ehekushon den kua tur hende ta rekonosé nan mes aden. E sektor mester tin atenshon pa TUR bario. Transporte públiko ta importante pa mas igualdat na akseso di empleo, mobilitat riba merkado laboral i mas independensia pa hóbennan, penshonadonan i hendenan ku limitashon. Ademas e lo kontribuí na baha gastu.

- Maneho di transporte públiko ku ta akapará taksi, tour bús, AB bús.
- Kumpra bús sostenibel pa transporte públiko. Por ehèmpel bús ku pènel solar i/of bús eléktriko.
- Mehora transporte marítimo ku un fèri entre islanan ABC. Esaki ta stimulá mobilitat entre nos islanan.

### **Transporte entre islanan ABC.**

Hasi transporte entre islanan ABC mas aksesibel dor di konsiderá esaki komo transporte públiko.

## 7. M21 i gobernashon

### Un gobièrnu pa tur siudadano

M21 ta para pa un gobièrnu pa tur siudadano, ku ta sirbi pueblo i ku ta duna espasio, libertat i oportunitat na tur siudadano pa por desaroyá nan mes. Un gobièrnu ku ta stimulá iniciativa propio, partisipashon, ku ta empoderá e siudadano pa tuma rienda di su desaroyo den su mes man, ku ta krea kondishon i kuadro legal pa sostené un bon funshonamentu di nos sosiedat. Un gobièrnu ku ta skucha kiko ta biba den pueblo i ku ta konsultá ku gremionan, ku ta stipulá e metanan i strategianan nesesario pa un desaroyo sostenibel. Un gobièrnu ku ta duna su kuerpo di ámtenar espasio pa traha riba formulashon i ehekushon di maneho ku mester kondusí na e metanan stipulá i sirbi komunidad di un forma digno i efisiente.

#### **Tur siudadano ta konta**

Mester revisá nos leinan pa asina garantisá ku tin e “checks and balances” nesesario pa evitá diktadura di mayoria i un desbalanse den nos “trias polítika”. Demokrasia mester respirá e punto di salida ku e mayoria semper ta tene kuenta ku e minoria. Den e kuadro aki mester instalá un komishon di nos mihó ekspertonan estatal i mentenan kreativo pa revisá nos leinan. Entre otro mester studia introdukshon di un Ofisina di Asuntunan Konstitushonal. Ademas mester ankra den lei ku kualke kambio di struktura estatal ta posibel solamente via di aprobashon di 2/3 parti (67%) di nos poblashon den un konsulta ku pueblo.

#### **Evaluá nos sistema polítiko**

Nos sistema polítiko no ta kumpli mas ku e espektativanan di un gran parti di nos poblashon. Konsekuentemente ta deseabel pa seriamente evaluá nos sistema polítiko di koalishon i finansiamentu di kampaña i eventualmente proponé sistemanan diferente ku ta kuadra mas ku nos realidat i ta kontribuí na mihó gobernashon, transparensia i bienestar general.

#### **Evaluá nos Konseho Insular.**

Mester bin ku un tim pa evaluá nos Konseho Insular. Responsabilidanan vs kompensashon. Mester drecha Konseho Insular promé ku ekspandé esaki.

#### **Mas partisipashon di gobièrnu di Entidat Públiko Boneiru den gobièrnu di RCN.**

Boga pa mas partisipashon di nos Gobièrnu den Gobièrnu di RCN. Nos a duna e tareanan nan RCN pero e pueblo ta pidi nos gobernantenan lokal pa kuenta i rason. Nos gobernantenan lokal mester por komuniká deseo di pueblo na e gobernante di RCN.

#### **Mas partisipashon di nos hóbennan.**

Mester krea un struktura pa nos hóbennan tin mas partisipashon den desishon nan ku ta konserní nan. Tambe desishonnan ku tin konsekuensia den futuro. Nos hóbennan ta vèrsá den futuro di mundu, esaki ta pone ku nan ta mira solushon den kuadro di futuro.

#### **Mas transparensia den desishonnan ku Gobièrnu tuma**

Mester introdusí un registro (online) kaminda pueblo por buska informashon relashoná ku desishonnan ku Gobièrnu tuma huntu ku e dokumentonan ku a usa pa yega na e desishon final.

#### **Fortifiká nos institutonan estatal**

Mester fortifiká, profeshonalisá i balorá nos institutonan estatal: institutonan manera Konseho Insular, Kontrolaria General, Defensor di Pueblo (inkluso pa mucha) i direktorado enkargá ku mantenshon i supervishon mester fun-sho-ná mihó pa protehá i fortifiká nos demokrasia. Fortifikashon di nos institutonan ta parti di e konsenshi ku ta nos ta e proméan responsabel pa bon funshonamentu di gobernashon i demokrasia den nos estado di de-recho.

#### **Invertí den i fortifiká nos kuerpo di ámtenar**

Pa sirbi komunidad di un forma digno i efisiente mester tin trankilidat atrobe den e kuerpo di ámtenar. Ta imperativo pa mas pronto posibel krea klaridat, para e supuesto “revitalisashon di e aparato públiko” i terminá ku e proseso di reorganisashon ku te ainda ta krea hopi demotivashon den e aparato. Mester traha riba ubikashon mas sentral i aksesibel posibel i di ménos kosto pa servisionan di Gobièrnu. Kalidat di servisio na pueblo, entre otro “Bentana di informashon”, mester ekspandé i mehorá.

#### **Instituí Konseho di Barrio**

Gobièrnu mester skucha kiko ta biba den pueblo, konsultá ku gremionan pa stipulá e metanan i strategianan nesesario pa un desaroyo sostenibel. Den e kuadro aki ta deseabel pa stimulá siudadanonan pa mas tantu posibel nan mes tuma un ròl aktivo den tur toma di desishon ku ta afektá nan bida i nan alrededor. Tur barío mester ta organisá na un manera demokrátiko ku su propio konseho di barío.



### ***Profundisá konosementu polítiko di miembronan di Konseho Insular i Kolegio Ehekutivo***

Miembronan di Konseho Insular ta kontrolá Kolegio Ehekutivo. Pa tal rason nan mester ta bon na altura di e outoridat legal di Konseho Insular i e leinan ku ta rigi funshonamentu di Konseho Insular. M21 ta bai instituí den un forma permanente seminario/tayer di trabou/ kurso/ pa:

- miembronan nobo di Konseho Insular i Kolegio Ehekutivo haña entrenamentu pa por ehekutá e base di nan tarea nobo mas mihó.
- miembronan eksistente di Konseho Insular mensualmente haña kurso pa ampliá nan konosementu i tene esaki na nivel.
- traha huntu ku RaadslidNU i Prodemos. RaadslidNu i Prodemos ta sostené miembronan di Konseho Munisipal den nan trabou. Nan ta hasi esaki entre otro pa medio di dunamentu di kurso i kompartí 'best practices'.
- e funshon di miembro di Konseho Insular mester bira un djòp fultaim di moda ku nan por dediká nan tempu kompletamente na e trabou komo representante di pueblo.

### ***Relashon di koperashon mas estrecho ku "VNG"***

E Asosashon di Munisipionan Hulandes (Vereniging van Nederlandse Gemeenten – VNG) ta e federashon di tur munisipio. Nan ta sostené e munisipionan entre otro ku tradukshon di maneho nashonal pa maneho munisipal. Nan ta atendé interes di e diferente munisipionan. VNG ta sostené e munisipionan den nan ambishon pa desaroyá nan mes mas aleu. Tanten ku Boneiru ta den e struktura estatal aktual, e por hasi bon uso di konosementu i sosten di VNG.

- Traha mas intensivamente huntu ku VNG.
- Hasi mas riba tereno di 'networking' ku munisipionan mas chikitu durante kongresonan anual di VNG.
- Stimulá 'twinning' i 'benchmarking' ku munisipionan mas chikitu.

### ***Registrá i manehá propiedatnan di Gobièrnu***

Bonaire Overheidsgebouwen NV (BOG) mester bira Bonaire Vastgoed NV (BV). Bonaire Vastgoed lo mester bai manehá tur edifisio públiko i tereno (di deporte) di gobièrnu. BOG ta responsabel pa drecha, mantené i hür edifisionan di gobièrnu. Entrada di BOG ta konsistí di e pagonan di hür ku drecha i benta di edifisionan i saka tereno den erfpacht

- Profeshonalisashon di BV. Instituí un Konseho di Supervishon.
- Hasi análisis pa loke ta trata funshonamentu di trahadó- i miembronan di BV. Enkargá BV ku konstrukshon i maneho di un ofisina sentral di gobièrnu.
- Prepará terenonan di erfpacht pa Gobièrnu por emití esakinan.

## 8. M21 i desaroyo sostenibel ku atenshon èkstra pa medioambiente, naturalesa i bienestar di animal.

### *Invertí pa futuro*

E manera ku nos ta biba i konsumí mester ta den ekilibrio ku nos medioambiente i rekursionan p'asina pèrkurá ku e manera di biba i konsumí di nos futuro generashon no ta na peliger. Henter e pensamentu aki di desaroyo duradero/sostenibel mester keda internalisá den e manera ku nos ta goberná i planifiká pa futuro.

Naturalesa ta importante pa Boneiru. Nos ta biba di naturalesa. Nos antepasadonan tambe tabata hasi esei. Komo hende nos ta dependé di naturalesa. P'esei nos mester kuida nos naturalesa bon. Kambio di klima ta un dje desafionan mas grandi di awendia. E efektonan negativo di cambio di klima tin influensia riba desaroyo sostenibel di Boneiru. Mundu ta bira mas kayente. Nos awa di suela ta bira mas salu. Superfisie di laman ta subi. Oséanonan ta bira zür. Esakinan i vários otro influensia di cambio di klima tin un impakto grandi riba nos isla. P'esei atendé ku problemanan di klima ta sumamente importante.

Tur sektor den nos komunidad tin un impakto riba nos biodiversidat. P'esei nos mester invertí den esaki. Nos tin un Parke Marino i un parke di naturalesa protehá. Pero nos mester hasi mas si nos ke mantené nos bunita naturalesa. P'esei nos mester tuma e "Ophetivonan di Desaroyo Sostenibel" di Nashonnan Uní na serio i ehekutá nan. M21 ta proponé e siguiente akshonnan pa invertí pa futuro:

### *Krea kondishon pa promové bienestar di animal*

E garantia pa bienestar di bestia ta importante. M21 ta boga pa krea kondishonnan pa mehorashon pa bienestar di animal.

- Revishon di legisashon eksistente di bienestar di animal.
- Strukturalmente reservá mediona riba e presupuesto na fabor di e bienestar di animal.
- Evaluá loke tin i bin ku un maneho duradero pa Buriku i otro bestianan ku ta kana liber na Boneiru
- Instituí un kuerpo di polis di bestia i akuerdo ku e modelo di Hulanda.
- Realisá di un proyekto di chep ku un base di dato di manera ku por haña doñonan di un bestia mas rápido bèk.
- Sostené burikunan di mondi den tempu di sekura ku èkstra lugá pa bebe awa i kuminda. Prohibí kaptura i seramentu permanente di e burikunan di mondi. E burikunan ta kana pa añanan lòs den mondi. Nos mester adaptá nos mes na e burikunan i no nan na nos. E burikunan ta forma un atrakshon turístiko.
- Stimulá un proyekto di sterilisashon pa kachó i pushinan. Esaki por sosodé pa medio di un kontribushon finansiero.

### *Desaroyo di un plan di maneho pa medioambiente Hulanda Karibense*

Konforme e lei VROM BES anualmente Entidat Públiko Bonaire mester stipulá un programa di medioambiente. Esaki ta pendiente pasobra e plan di maneho pa medioambiente Hulanda Karibense no ta kla ahinda. Ministerio di Infrastruktura i Maneho di Awa conforme artíkulo 1.4.1. di lei VROM BES kada sinku aña mester stipulá un plan di maneho pa medioambiente. Ahinda nunca e ministerio a hasi esaki. Sin e plan aki Boneiru no por stipulá un kuadro stratégiko i finansiero pa e programa di medioambiente lokal.

- Mustra gobièrnu hulandes riba su obligashon legal. Eksigí di Ministerio di Infrastruktura i Maneho di Awa pa kumpli ku e obligashon aki den 2023.
- Despues di kaba stipulashon di e plan di maneho pa medioambiente Hulanda Karibense, stipulá e programa di medio ambiente Boneiru.
- Stipulá e kuadro stratégiko i finansiero di e programa di medioambiente lokal.

### *Invertí mas den naturalesa i medioambiente*

Invershon den nos naturalesa i medioambiente ta nesesario si nos ke mantené esakinan. Banda di esei nos naturalesa i medio ta sumamente importante pa nos ekonomia.

- Reevaluá relashon ku STINAPA den kuadro di maneho pa naturalesa.
- Evaluá pa kombiná impuesto di turista i 'nature fee' i stipulá adelantá pa kiko ta bai destiná esakinan.
- Strukturalmente reservá medionan riba presupuesto na benefisio di naturalesa i medioambiente
- Prohibishon general di artíkulonon di plèstik desechabel i baki di fom. Inventarisá kua produktonan por usa na lugá di esnan prohibí.
- Introdukshon di "statiegeld".
- Reforestashon masal di Boneiru (infrastruktura bèrdè). Planta mas palu i palu di mangel. Planta koral riba eskala grandi.
- Traha un plan pa salba i rehabilitá Lac/Sorobon inkluso un plan pa un "boardwalk" rekomendá pa direktor di Ramsar.
- Hasi un estudio i rehabilitá Saliña di Vlijt.
- Traha un "boardwalk" na Saliña di Vlijt.
- Hasi un estudio i rehabilitá Lagun i su saliña.
- Ampliashon di parkenan nashonal protehá. Designá henter e punta sùit di Boneiru komo parke nashonal. Ku mantenshon di produkshon di salu sostenibel.

- Prohibí konstrukshon pegá ku kosta.
- Mantené e kontribushonnan di empresanan i bishitantenan pa uso di nos naturalesa.
- Instituí un sentro lokal di investigashon biológiko sientífiko (proef-tuin) na Boneiru. E sentro aki ta kontené diferente laboratorio, akomodashon pa investigadónan, medionan i otro fasilitatnan.
- Kombiná e departamentonan di naturalesa, medioambiente di Direktorado di Planifikashon i Desaroyo i hasi nan un departamento di naturalesa, i klima. E ora ei e departamento aki entre otro por konektá Boneiru na un manera duradero ku partnernan di konosementu internashonal i invershonistanan den region i Union Oropeo. Banda di esei e departamento ta responsabel tambe pa desaroyo di maneho duradero.

### ***Mehorashon di kalidat di awa di suela***

Pa gran parti a realisá e proyekto di kloaka, pero e no ta kla kompletamente ainda. E kloaka i e instalashonnan di purifikashon di awa shushi ta esensial pa protekshon di salubridat públiko, ref di koral i nos ekonomia.

- Prevení kontaminashon di laman i redusí esaki debidamente. Berpùt ta kontaminá awa di suela. Esaki ta okashoná ku awa shushi ta bai laman. Esaki ta afektá e refnan di koral.
- Finalisá e proyekto di kloaka komo debe ser.
- Krea sistemanan profeshonal pa mantené e awa di shelu riba tera i asina yuda den e kalidat di e awa den supsuela.

### ***Stipulá akuerdo di klima ku den Haag***

Un di e efektonan negativo di kambio di klima ta subimentu di superfisie di laman. Hopi ref di koral no por soportá esaki. Esaki ta hasi e chèns pa eroshon i inundashon mas grandi. Ref di koral ta un kibraola natural. Si nan bai resultá muchu hundu bou di awa pa motibu ku superfisie di laman ta subi, nan no por frena e olanan bon mas. E ora ei e olanan por yega mas serka kosta, di manera ku e chèns pa eroshon i inundashon ta oumentá.

- Mas pronto posibel formulá un akuerdo di klima ku gobièrnu hulandes.
- Mostra gobièrnu hulandes riba e Ophetivonan di Desaroyo Sostenibel 12, 13, 14 i 15 di Nashonnan Uní. Esakinan nan tin ku tuma na serio pa Boneiru.
- Prepará pa konsekuensianan di kambio di klima riba Boneiru.



### ***Energia duradero i pagabel***

M21 ta sostené energia alternativa. Un maneho responsabel di energia ta enserá ku ta traha tantu riba redukshon di emishon di karbon komo riba garantia di suministro di koriente. Mester fiha metanan realístiko pa yega na mas energia alternativo. Den esaki WEB i Contour Global mester tuma liderato i konsekuentemente garantisá suministro di energia konfiabel i duradero. Boneiru mester haña mas partisipashon den suministro di energia i mester revisá ròl di OTB i BBT den esaki.

### ***Buska konekshon ku ret internashonal di gas***

Den kuadro di suministro di energia pagabel, Boneiru mester investigá e posibilidatnan di buska konekshon riba e ret di gas natural di Colombia pa islanan den Karibe.

## 9. M21 i agrikultura, peska i krio di bestia

**Un Boneiru ku por sòru pa su mes produkshon di kuminda i ku ta bai bèk na su rais komo lider riba tereno di agrikultura, peska i krio di bestia**

Agrikultura, peska i krio di bestia ta importante.

M21 ta mira e importansia pa rebibá e sektornan aki. Ta importante pa Boneiru mes por kultivá mas bèrdura i fruta biológiko i otro produktonan pa uso lokal. Alimento ku ta seif pa kome. Produsí ku rèspèt pa medioambiente. E ora ei mas siudadano por kome mas salú. Esaki ta mehorá salubridat públiko. Banda di esei e ta sòru pa un revitalisashon di e sektornan aki pa entrada i empleo èkstra. Un komunitat próspero mester di un área di kunuku próspero. P'esei organisashon i protekshon di nos agrikultura, peska i krio di bestia ta sumamente importante.

Puntonan di akshon pa un Boneiru ku ta sòru pa su mes produkshon:



### **Siguridat di alimentashon: agrikultura, krio i peska**

Siguridat di alimentashon, esta e garantia ku tin sufisiente alimentashon disponibel i ku poblashon tin aksesu na dje, ta un asunto di importansia grandi, sigur awendia ku tin mas boka na mundu i ku kosechanan no ta produsí sufisiente. Boneiru mester ta prepará pa esaki i mester invertí den agrikultura, krio i peska i trata e sektor aki komo un área di prioridat. Koperativismo den produkshon i benta mester ta un instrumen-to den esaki. Produkshon di alimento no por ta dis un pasa tempu. Mester aloká tereno sufisiente i invertí den teknologia adekuá i asosiá ku sentro di konosementu pa asistensia tékniko p'e sektor. M21 ta bai stimulá mas koperativismo bou di produktornan di alimento.

### **Sòru pa awa pagabel**

Awa ta hopi importante den agrikultura. Tin diferente pos na Boneiru. Lamentablemente e awa den mayoria pos no ta adekuá pa agrikultura. M21 ta haña ku mester bini mas alternativa pa sigurá produkshon i distribushon di awa den e sektor aki.

- Sistemanan manera 'reverse osmosis' i otro teknologianan moderno
- Áreanan pa ekstrakshon di awa. Rònt di e áreanan aki por desaroyá un sentro di produkshon.
- Rekohé awa di yobida den tankinan di awa grandi i será.

### **Desaroyá un sentro di konosementu**

Ta importante pa krea un sitio sentral, kaminda kunukeronan, invershoni-stanan, studiantenan i interesadonan por interkambiá resultadonan di investigashon i eksperensia i konosementu ku otro. Un sitio kaminda hendenan por haña informashon tokante agrikultura, peska i krio di bestia boneriano.

- Pa medio di un sentro di konosementu ta kordiná aktividatnan riba tereno di agrikultura, peska i krio di bestia.
- Pa medio di e sentro di konosementu ta ehekutá investigashonnan importante.
- E sentro di konosementu ta duna guia na stazjènan ku ta hasi estudio den e sektornan aki.
- Empleadonan di e sentro di konosementu por duna konseho i guia na kunukeronan tokante krio di bestia i agrikultura.
- E sentro di konosementu por organisá tayer pa habitantenan ku ke kultivá bèrdura i fruta den nan propio hòfi pa nan propio uso.

### **Alsa nivel di krio di karné i kabritu**

Produkshon di karni ku ta di bon kalidat ta importante.

- Promové kuminda di bestia pagabel i di kalidat haltu. M21 ta haña importante pa duna mas atenshon na posibilidat pa kuminda di bestia lokal. Por ehèmpel den koperashon ku AlgaePARC Bonaire i kunukeronan lokal.
- Mehorashon di rasanan lokal pa medio di un plan bon elaborá.
- Kontrolá kalidat di e bestianan dor di registrá nan.
- Sòru pa mas supervishon i siguridat den áreanan di krio di bestia. Hasi áreanan di krio di bestia mas sentral ta hasi tenementu di supervishon mas fásil.
- Eksplotá krio di bestia komersial- i saludabel.
- Al final eksportashon di karni di kabritu di bon kalidat den reino, ku un seyo di kalidat boneriano riba dje.



### **Ofresé enseñansa riba tereno di agrikultura, peska i krio di bestia**

Enseñansa riba tereno di agrikultura, peska i krio di bestia ta un kondishon importante pa alsa e nivel dentro di e sektornan aki. M21 ta bai introdusí un estudio di agrikultura, peska i krio di bestia riba nivel di MBO na Boneiru.

- Invertí den kapasitashon di kunukero-, piskadó- i kriadónan di bestia. Un oumento di konosementu ta sòru ku produktornan lokal por traha mas efisiente i mas dirigí riba resultado.
- Promove koperativismo den produkshon i komersialisashon den e áreanan aki.

### **Desaroyá áreanan di agrikultura**

M21 ta haña importante pa desaroyá áreanan di destinashon tambe spesialmente pa agrikultura profeshonal. Den esaki M21 ta sostené e proposishon manera poné den e "Kadernota Maneho di Tereno 2022".

### **Promoshon di akuakultura Boneriano**

Akuakultura ta kultivashon di piská i otro bestianan di laman pa por hasi negoshi ku esakinan. Kultivá piská na un manera sostenibel ta nos futuro. Den pasado ya kaba Boneiru tabatin un kultivo di piská. Kultivá piská i otro bestianan di laman pa konsumo propio. Banda di esei si ta kultivá sufisiente por eksportá tambe den region i den reino.

- E kultivo ta drai kompletamente riba energia bèrdè for di bientu, solo i biogas.
- Kultivá piská i otro bestianan di laman protehá pa finnan komersial. Por ehèmpel karkó. Hasiendo asina nos por protehá e piskánan i bestianan di laman aki ku ta bou di menasa di ekstinsjon pa motibu di konsumo eksesivo mas mihó tambe.
- Entrená hendenan lokal ku por traha den e kultivo aki.
- Traha huntu ku AlgaePARC Bonaire pa entrega di hariña di algae boneriano pa akuakultura boneriano.

# 10. M21 i ekonomia

## Invertí pa ekonomia kana atrobe i kana pa tur hende

Nos hendenan ta sklama pa un ekonomia ku ta kana atrobe. Un ekonomia ku ta kana pa tur hende, no solamente pa un grupo chikitu so. Mester realisá ku sin un ekonomia ku ta kana no ta posibel pa tin sufisiente entrada pa Gobièrnu hasi e invershonnan nesario pa konstruí un mihó Boneiru pa nos yunan. Un ekonomia ku ta krese ta e mihó garantia pa krea kupo di trabou i drecha finansa públiko. Tambe un ekonomia ku ta krese ta sòru pa inovashon, ta krea perspektiva pa nos yunan den eksterior i ta amplia e forsa di kompra di nos pòtmòni. Pa nos ekonomia krese, mester traha riba konfiansa i sentral ta un merkado liber ku regulashonnan nesario pa garantisá kompetensia sano.

Ta importante pa kada habitante por aportá sigun su forsa na desaroyo i kresementu ekonómiko di Boneiru. Desaroyo i kresementu ekonómiko mester kana den harmonia ku naturalesa. Pa gran parti ekonomia boneriano ta dependé di nos ambiente di biba i nos naturalesa. Turismo ta un fuente di entrada importante riba nos isla. Pa un gran parti nos ekonomia ta basá riba turismo i ku esei indirektamente tambe riba nos naturalesa i e manera ku nos ta eksperensia naturalesa.

M21 ta boga pa un ekonomia sostenibel. Un ekonomia kaminda nos ta kombiná kresementu, oumento di forsa di kompetensia i un oumento di oportunitat di trabou ku un mihó manejo di espacio. Teniendo kuenta ku nos naturalesa i ku redukshon di preshon riba medioambiente. Un Boneiru ku desaroyo sostenibel ta un Boneiru kaminda tin kestion di un ekilibrio ideal entre interesnan sosial ekonómiko i interesnan ekológiko.

Un Boneiru kaminda mas empresa ta hasi negoshi na un manera sosialmente responsabel (Maatschappelijk Verantwoord Ondernemen – MVO). Esaki ta nifiká ku empresanan ke karga responsabilidat pa problemanan sosial manera daño na medio ambiente i naturalesa, sirkunstansianan di trabou òf pobresa. E ora ei empresanan no ta tuma desishonnan ku ta hasi e problemanan aki mas grandi.

Empresarionan ku ta bai un paso mas aleu. Ku ta aspirá pa duna un aporte na solushon di e problemanan aki. Na Boneiru tin por ehèmpel diferente empresa di buseo ku ya kaba ta hasi negoshi na un manera sosialmente responsabel. Tin di nan ku ta organisá limpiesa (clean ups) a lo largu di nos bichnan òf bou di awa. Otronan ta promové entre otro pa medio di ‘sponsoring’ ku mas hóben lokal ta siña sambuyá. Di e manera ei mas hende lokal ta siña konosé i protehá nos mundu bou di awa.

Asina sigur tin mas empresario na Boneiru ku ya kaba ta hasi negoshi na un manera sosialmente responsabel. M21 ta kere den un mihó koperashon entre gobièrnu i mundu empresarial. Den promoshon di un ekonomia sostenibel i hasi negoshi na un manera sostenibel. Un ekonomia sostenibel ta importante si nos ke profilá nos mes komo Blue Destination. Al final nos tur ta probechá si nos ekonomia ta floresé.

Pa un ekonomia ku ta kana na fabor di nos tur, M21 ta proponé e siguiente akshonnan:

### **Direktorado di Desaroyo i Ekonomia.**

Mester bini ku un Direktorado di Desaroyo i Ekonomia. Ekonomia ta muchu importante pa e no tin su mesun direktorado. Mester krea un plataforma pa Direktorado di Desaroyo i Ekonomia por interkambiá ku depar-ta-men-to di Naturalesa i Medio Ambiente. Tambe mester por interkambiá ku kompanianan di gobièrnu ku ta sòru pa infrastruktura pa e klima di invershon keda atraktivo pa invershonistanan.

### **Fortalesé i krea sektornan ku ta generá divisa: turismo, zona franko, sektor finansiero internashonal**

Mester fortifiká nos pilanan di ekonomia ku ta krea divisa. Turismo mester keda un pilá di prioridat. Banda di turismo mester krea mas perspektiva pa un zona franko i konsiderá insentivonan pa hasi Boneiru un sentro di transbordo entre Europa i Sur Amérika. Tambe por atraé industria limpi ku ta den harmonia ku nos medioambiente. Pa e sektor finansiero internashonal mester krea un “Financial Services Board” ku ta enkargá ku “bran-ding”, merkadeo i produktonan nobo di nos sektor finansiero internashonal.

### **Un vishon pa Turismo**

Turismo ta generá divisa i ta un fuente di entrada ku por yega dirèkt ser-ka e pueblo. Turismo mester wòrdi manehá di tal manera ku e pueblo tam-be por haña su granito di e desaroyo di turismo. Mester inverti den Turismo di un manera sostenibel.

- Puntonan di atenshon ta:
- Bin ku un skol di turismo
- Evaluá pa TCB bira Bonaire Tourism Authority i haña struktura di ATA.
- Reevaluá e sektor
- Follow-up riba plan maestro
- Desaroya mas airlift
- Prepara i forma nos mes hendenan pa nan haña mas oportunitat den funshonnan mas haltu den turismo.
- Garantisa un entrada justo pa e trahado den turismo (CAO sektoral) i kita impuesto riba “Tips”.
- Krea un bulevar di Pùnt Firkant te na Kura di Piedra na Hato pa hendenan lokal i turistanan.

### **Turismo krusero**

Turismo krusero ta un pilá di nos ekonomia i ta krea aktualmente entrada dirèkt pa e hòmber chikí. Mester krea un vishon duradero i mester bini ku un manejo huntu ku stakeholdernan pa desaroyá e produkto pa por maksimalisá probecho di esaki. Traha un plan pa sigui desaroyá turismo krusero di un manera sostenibel.



### **Soña mas i tribi mas: ekonomia nobo**

Nos mester realisá ku e sektornan ku semper tabata eksitoso, manera turismo, no ta keda pa semper eksitoso. Mester invertí den inovashon i den sektornan ekonómiko nobo. M21 ta proponé den e kuadro aki pa bin ku un “Instansia di Planifikashon Sosial Eekonomiko” pa atendé, planifiká i konsehá riba nos desaroyo sosial ekonómiko riba término mediano i largu. Algun sektor nobo pa konsiderá ta industria kreativo (sine, moda, software i otro) asina yama Orange Economy, ekonomia di konosementu, “transnational education”, industria di “niche”, esta industrianan ku un produkto/servisio úniko pa un segmento partikular. Banda di esaki mester eliminá monopolio den haf i hasi mihó uso di e posibilidatnan portuario di nos isla.

### **Studia posibilidatnan pa BOPEC.**

Mester studia i sostené posibilidatnan pa desaroyá BOPEC i/òf terenonan di BOPEC. Bini ku un solushon duradero pa BOPEC i/òf terenonan di BOPEC.

### **Sera dil nobo ku Cargill.**

E areglonan ku Cargill ta yegando na nan fin despues di 60 aña. Mester negoshá un dil nobo ku Cargill. Tumando tur aspekto den konsiderashon mester yega na un dil nobo ku Cargill ku ta kumbiní Boneiru.

### **Mas espasio pa empresario chikí: ekonomia di barío**

Boneiru mester di mas empresario i sentido empresarial pa krea empleo, trese inovashon, diversifiká nos ekonomia i hasi nos hendenan ménos dependiente di Gobièrnu. Den e kuadro aki Gobièrnu huntu ku sektor privá mester hasi mas esfuerso pa inventarisá i kapitalisá riba oportunitat pa hasi negoshi den barío, lokual ta yama ekonomia di barío. Ekonomia di barío no ta solamente un oportunitat komersial pero ta kontribuí tambe na hasi bida den barionan mas agradabel. Den esaki Gobièrnu por hiba un maneho di desentralisá (parti di) servisionan den barionan.

### **Hasi forsa laboral mas kompetitivo**

Labor ta determinante pa kon kompetitivo bo ekonomia ta. Via plataforma di Diálogo Sentral mester yega na palabrashon kon ta subi nos produktivitat di labor. Tambe mester wak kon ta yega na palabrashon pa introdukshon responsabel di e konsepto di CAO pa sektor pa protehá e trahadó.

### **Invertí den infrastruktura**

Invershon den infrastruktura ta nesario pa futuro kresementu ekonómiko i pa stimulá aktivitat di konstrukshon. Invershon den infrastruktura ta e katalisadó pa ekonomia. Mester yega huntu ku partnernan na un pakete di invershon den nos kareteranan (eksistente i nobo), mantenshon di esakinan i otro obranan di infrastruktura.

### **Desaroyá aeropuerto i nos hafnan komo pilanan ekonómiko.**

Mester krea desaroyo rònt di aeropuerto i nos hafnan pa yuda karga e aktivitat portuario ku esakinan tin. Aeroportonan no ta fungi solamente pa transporte di hende i karga pero ta desaroyá tambe komo sentro di aktivitat ekonómiko.

### **Krusa frontera: ekonomia internashonal**

Tin hopi oportunitat ekonómiko riba merkado internashonal. Boneiru no tin ningun tratado komersial i esaki mester kambia. Ta un prioridat pa nos isla atendé su relashon ku e Organisashon Mundial di Komersio (WTO) i a base di un maneho di eksportashon, inisiá tratadonan komersial ku partnernan komersial interesante pa nos. Ademas mester sera akuerdo di protekshon i invershon bilateral. Den e kuadro aki ta importante pa hasi miho uso di embahadanan di Reino, ademas di tratadonan eksistente ku Hulanda tin ku otro pais i tambe di e areglo komersial ku Boneiru tin ku Union oropeo, esta e areglo di Paisnan i Teritorionan Ultramar. M21 ta bai promové tambe pa Boneiru nombra algun representante ekonómiko den e merkadonan ku por kontribuí mas tantu na nos kresementu ekonómiko. M21 ta bai evaluá tur loke ta na fabor i tur loke no ta na fabor di Boneiru komo teritorio ultra-periférico.

### **Promoshon di un kresementu ekonómiko sostenibel**

Hopi sektor na Boneiru por probechá di un mihó integrashon di mantenshon di naturalesa den nos desaroyo ekonómiko. Naturalesa ta e rekursu pa desaroyo ekonómiko di Boneiru.

- Baha ABB pa artikulonan produsí i servisionan duná na un manera sostenibel.
- Protekshon di derechonan laboral i sòru pa sirkunstansianan hustu di trabou.
- Stimulá desaroyo di proyekto sostenibel.
- Formulé i ehekutá un plan maestro pa ekonomia sostenibel. E plan maestro pa turismo i e plan maestro pa ekonomia sostenibel mester por komplementá otro.
- Bini ku seyo di kalidat pa produktonan i organisashonnan honesto i sostenibel. Di e manera ei nos por yuda e konsumidó pa hasi eskoho mas konsiente.
- Duna mas atenshon na inovashon bèrdè.



### ***Krea kupo di trabou pa poblashon lokal***

Krea kupo di trabou ta yuda enormemente den redukshon di desempleo. M21 ta haña importante ku kada siudadano na Boneiru tin derecho riba trabou.

- Stimulá invershon na Boneiru.
- Desaroyá Rincon, Playa Grandi, Playa Frans i otro sitionan pintoresko komo atrakshon turístiko sostenibel riba eskala chikitu.
- Krea kupo di trabou den rekuperashon di naturalesa, agrikultura, akuakultura i e Parkenan Marino.
- Traha huntu ku sektor privá den kreamentu di kupo di trabou pa poblashon lokal.
- Sigui desaroyá e konsepto di landschapspark Rincon.

### ***Stimulá empresa mediano i chikitu (MKB) sostenibel***

Hasi negoshi na un manera sostenibel ta konosí tambe komo 'hasi negoshi na un manera sosialmente responsabel'. Boneiru tin mester di mas empresa ku ta sostenibel i konsiente di naturalesa. Un empresa ku ta hasi negoshi na un manera sostenibel, den tur desishon ku e empresa tuma, no ta aspirá solamente un rendimentu mas haltu. Banda di hasi ganashi e empresa ta utilisá tambe e oportunidatnan pa un mihó medio ambiente i un mehorashon di bienestar di su trahadónan i di Boneiru. Esaki e empresa ta hasi a base di un embolbimentu sosial i un vishon ku enfoke riba futuro.

- Introdusí un banko di desaroyo di i pa Boneiru.
- Stimulá invershon den empresanan ku por hasi fianza ku interes abou.
- Krea un fondo di garantia pa MKB nan.
- Rekompensá organisashonnan ku ta hasi negoshi na un manera sosialmente responsabel.
- Protehá e merkado di empresa mediano i chikitu pa stimulá empresarionan lokal.
- M21 ta sostené pa bini ku insentivonan fiskal pa invershonnan inovativo.
- Krea un struktura pa stimula i sostene MKB di un manera permanente.

# 11. M21 i un Bonaire seif

## Siguridat garantisá

E kambio di klima mundial por tin konsekuensia grandi pa Boneiru. Awor aki te ainda ta tene muchu tiki kuenta ku esei. Na Boneiru nos mester ta konsiente di e potensial peligernan di kalamidat. P'esei ta importante pa formulá instrukshonnan i medidanan (te asina leu ku nan no t'ei) i sigui nan (si nan t'ei).

Puntonan di atenshon pa un Boneiru mas seif:

### Garantisá siguridat na pia di trabou

Siguridat na pia di trabou i ambiente di trabou meresé mas atenshon den nos legislashon laboral. Esaki ta konta prinsipalmente den sektor di konstrukshon. M21 ta bai paga èkstra atenshon na esaki.

- Laga investigá situashonnan ku no ta seif na tur empresa na Boneiru.
- Relashoná ku e investigashon aki tuma e pasonan nesario pa solushoná e situashonnan ku no ta seif aki.

### Mester ta mihó prepará pa kalamidat

Mirando e kambionan klimatológiko ta importante ku nos ta bon prepará pa posibel kalamidatnan.

- Konstruí shèlter ku ta resistente kontra orkan.
- Desaroyá mapa pa kalamidat. Mapa den kua ta indiká kua ta e lugánan ku ta seif durante un kalamidat. Manera por ehèmpel un tsunami.

### Traha riba prevenshon di kriminalidat den nos barionan

Un oumento di pobresa mayoria biaha ta bai kompañá ku un oumento di kriminalidat. Kada siudadano ke sinti su mes seif den su barío i den otro barionan na Boneiru. Un embolbimentu fuerte ku nan barío hopi biaha ta nifiká ku hendenan ta sinti nan mes mas seif.

- Duna mas atenshon na e manera ku e barío ta organisá. Esaki ta nifiká prevení dekadensia, por ehèmpel dor di deshasí di shushedat.
- Sòru pa sufisiente iluminashon den barío i traha asera adekuá.
- Stimulá lantamentu di un kuerpo di vigilansia den barío.
- Instituí Kuerpo di Boluntario Boneiru (VKB) di nobo.
- Averiguá si ofisialmente por kuminsá di nobo ku e tareanan ku SSV (Servisio di Siguridat i Vigilansia) tabatin den pasado.
- Stimulá kontaktonan mutuo den barío pa medio di konstrukshon di algun plèchi, parke di hunga i parke di aktividat. Stimulá organisashon di aktividat di rekreashon pa habitantenan di barío.

- Profesionalisá sentronan di barío i duna sosten den mantenshon di e sentronan aki. Sentronan di barío ku tin un utilisashon maksimal, ta stimulá kontakto mutuo entre habitantenan di barío.

### Mas mantenshon di nos lei- i reglanan

Nos lei- i reglanan tin komo meta pa mehorá kalidat di bida na Boneiru. Mantenshon di legislashon i regulashon ta nesario pa stimulá kumplimentu ku lei i regla.

- Mas kontròl i mas mantenshon den tráfiiko. Esaki ta sòru pa un tráfi-ko mas sigur.
- M21 ta boga pa instituí un "keuringslokaal" pa garantisá ku e vehíkulo ku ta partisipá na tráfiiko ta seif. Tambe M21 lo promové informashon i edukashon pa loke ta trata komportashon di usuarionan den tráfiiko.
- Pa siña komportashon den tráfiiko for di chikí, M21 ta bai konstruí un Parke di Tráfiiko.
- Mas kontròl i mantenshon visibel den tur negoshi i/òf aktividat komersial ku por afektá nivel di bida, seguridat i desaroyo
- Mas kontròl i mantenshon di e diferente leinan di medioambiente i naturalesa.



## 12. M21 i eksterior

### Habri porta pa mundu

Boneiru mester profilá muchu mas tantu riba nivel internashonal, spesialmente mirando ku tin hopi oportunidad komersial/ekonómiko riba merkado internashonal. Posishonamentu di Boneiru riba e tereno internashonal mester ta basá riba madures, profeshonalismo i mester enfatisá nos interesnan ekonómiko. Mester hasi esaki ku vishon i basá riba metanan realístiko.

#### Relashon ku Hulanda i den Reino

Relashon entre Boneiru i Hulanda mester drenta un era diferente. Un relashon basá riba madures, profeshonalismo, respèt mutuo i interes di Boneiru. Mester instituí un “Komishon di hende sabí” pa sinta di nobo na Boneiru promé i despues na mesa ku Hulanda i renegoshá e kontenido di nos aktual struktura estatal, esta Entidat Públiko. Boneiru mester kuminsá tuma rienda bèk den su man pa loke ta trata responsabilidatnan pa nos isla. Boneiru mester pèrkurá pa partisipá (mas) efektivu den delegashon di Hulanda ora ta trata temanan importante pa nos desaroyo, hasi mihó uso di embahadanan di Reino, e ret hulandes den mundu i tambe tratadonan ku Hulanda tin ku paisnan interesante pa nos (ku por keda ampliá pa inkluí Boneiru) pa nos krea mas oportunidad ekonómiko pa nos isla. Algun punto;

- M21 ta bin ku un direktorado di Asuntunan di Struktura Estatal i di Reino.
- Mester bin un representante di Boneiru na Den Haag.
- Mester evaluá struktura estatal kada 5 aña manera a palabra.
- Mester inventarisá i manehá palabrashonnan ku a hasi te awor i pa den futuro pa nan keda ehekutá.

#### Relashon ku Karibe

Bonaire ta un isla karibense. Laman Karibe ta uni nos den historia i futuro ku nos bisañanan. A base di esaki mester yega na modalidat i koperashon mas estrecho ku islanan den Karibe i esepialmente CARICOM (Komunidad di Karibe). Mester buska posibilidat di partisipashon di Boneiru den strukturanan multinashonal regional.

#### Relashon ku Union Oropeo

Boneiru ta miembro asosiá di Union Oropeo (EU). Nos mester hasi mihó uso di e relashon aki, prinsipalmente e relashon komersial ku EU. Nos mester usa e relashon aki pa krea i amplia oportunidad pa ekonomia nobo. Den e kuadro aki lo evaluá Boneiru den un posishon komo teritorio ultra-periférico.

#### Representashon diplomátiko

Banda di representashon ekonómiko (no-diplomátiko) manera menshoná den e kapítulo ekonómiko, den konkordansia ku Hulanda, Boneiru mester yega na palabrashon tokante un representante diplomátiko di Boneiru na Hulanda i tambe na embahadanan di reino den paisnan ku (por) ta komersialmente importante pa nos.

#### Diáspora boneriano

Mester hasi mihó uso di e talento, konosementu i ret di nos bonerianonan ku ta biba den eksterior (diáspora) i ku pa un òf otro motibu no por òf no ke bin bèk nan isla. Den e kuadro aki mester krea un punto di kordinashon denter di Ofisina di Relashonnan Eksterior pa atendé spesífikamente ku nos yunan di tera ku ta biba afó. E iniciativa aki ta kontribuí na nos ekonomia i alabes ta demostrá ku nos ta balorá nos yunan di tera ku ta biba den eksterior.



## **13. Konklushon**

---

*Nos mester tin un base sólido pa por konstruí ariba. E fundeshi mester ta bon pa e kas riba dje ta bon.*

*Pa medio di politika por trese e kambionan nesesario pa un mihó Boneiru, un Boneiru próspero kaminda tur siudadano ta disfruta di un nivel haltu di bienestar.*

*Ban fortifiká nos fundeshi pa nos por sigui konstruí un bon futuro pa nos generashonnan aktual i esunnan di futuro.*

**Nos ké, nos pór.**

**Ban tá**

---

***E Diferensia***

## Lista di kandidato



**1. Désirée Coffie**



**2. Bernard Landwier**



**3. Dayanara Janga**



**4. Carlos López-Natera**



**5. Alberseeto Cecilia**



**6. Angelo Engelhart**



**7. Alfred Burgos**



**8. Zuleykha Statie**



**9. Norbert Tadema Damman**



**10. Nadine Emerenciana**



**11. Anthony Weber**



**12. Amaro Gerard**



**13. Kjelld Kroon**



**14. Robert v.d. Vechte**



**15. Esther Zimmerman**



**16. Norman Warner**



**17. Benrick Martis**




**18. Mireille Saragoza-Korsten**



**19. Jurien Ascencion**



**20. Lorna Martis**



**21. Arnoldine Helmyr**



**22. Waldi Deira**



7902121



info@movementu21.com

MOVEMENTU21.COM